

Foyetonan atractivo di e hotel ya a keda cla Ramada Renaissance a presenta su mes na mundo hotelero

Convencion di Chic por a tuma nota di proyecto

ORANJESTAD(AAN)--

E hotel ta planea pa habri su portanan na fin di otro aña. E convencion di Chic a duna oportunidad pa presenta e proyecto na mundo turistico di Caribe y asina ya propaganda ta worde haci pa e hotel nobo, cu a conoce un foyeto atractivo tambe.

Antayera Ramada Renaissance a duna un presentacion di e proyecto, cu lo keda realiza na Aruba, na publico.

Construccion ya a cuminsa pa e proyecto mientras un contrato a keda alcanza cu Eagle Beach Hotel N.V. pa gerencia di e hotel, cu lo worde construi den vecindario di Concorde.

Lo construi e compleho hotelero den diferente fase pero na final Ramada Renaissance Hotel lo consisti di 210 camber di luho cu tur comodidad cu un turista por exigi. Renaissance ta conoci como e di tres cadena mas grandi di hotel na mundo. Segun e plan, lo desaroya cuatro edificio cu acomodacion hotelero y tambe casitanan cu ta keda canto di lamar.

Un inversion di 50 Million Dollar a worde haci pa Eagle Beach Hotel N.V. pa por realiza e proyecto, cu mester keda termina pa fin di otro aña.

E diseño di e hotel ta haci posible pa usa maximalmente e sitio canto di lamar y tur camber lo tin vista ariba lamar y vecindario.



A tene cuenta cu e gruponan cu ta bishita hotelnan y a inclui acomodacion especial pa gruponan, cu lo tin un lobby especial pa check in y salida. Diferente tienda lo ta presente den e hotel pa e huespednan.

E ambiente na piscina lo ta un formidable. E piscina lo ta rondona pa waterfall y matanan. Naturalmente lo dirigi atencion ariba fomento di deporte aquatico na e compleho.

Gerencia separa lo dirigi e Casino, cu lo keda situa den e lobby principal di e hotel, cu lo conoce varios restaurant, un comedor/teatro grandi, caminda shonnan lo worde presenta.

E coffeshop ta planea pa keda habri henter anochi, dunando asina servicio continuo na e turistanan.

Diferente bar lo tin den e hotel tambe.

Ta spera cu lo por acomoda alrededor di 400 persona den e sala principal caminda lo presenta show, mientras cu por reparti e sala den seccionnan mas chikito.

Ernesto r. Schwartzter di Eagle Beach Hotel a bisa cu a dicidi di yega na un acuerdo cu Ramada no solamente pa e capacidad di gerencia, pero tambe pa e entusiasmo di esnan involvi y e agresividad di e compania cu tin plannan ambicioso di expansion den Caribe y Latino America.

E division di Ramada International pa America Latino y Caribe, cu sede principal na Miami, ya tin plan pa 2 Mil camber den region di Caribe. E compania ya tin hotelnan na Grenada, St. Thomas y dos hotel na San Juan, mientras cu contrato pa otro hotel cu ta worde construi na St. Kitts, a keda firma.

Tambe Ramada tin intencion di habri hotel na e centronan turistico y comercial di Mexico. Dia Promer di Mei 1988 Ramada Renaissance a habri su portanan na Cancun, mientras cu otro hotelnan Mejicano na Campeche y La Paz awor ta bao gerencia di Ramada, cu tin tres division: Rodeway Inns, Ramada Inns y Renaissance Hotels.

